



BOLETÍN RSU OUTUBRO 2020

UNIVERSIDADE DE VIGO.

UNIDADE DE ANÁLISIS E PROGRAMAS



Os resultados foron probados no alumeamento LED instalado no campus de Ourensego

UNHA TESE AVANZA NO USO DAS LÁMPADAS LED COMO REDE DE INFORMACIÓN PARA A XESTIÓN DE "CIDADES INTELIXENTES"

DUVI OURENSE 02/10/2020

A fabricación de sistemas de iluminación intelixente nos que lámpadas LED equipadas con diversos sensores poden converterse nunha rede de información de parámetros importantes para unha cidade intelixente, como poden ser os niveis de contaminación, a polución acústica ou outras variables de interese. Este é un dos principais resultados da tese de doutoramento feita polo enxeñeiro industrial Eduardo Balvís. [+info](#).



FAITE MUVER E DEIXA ATRÁS O SEDENTARISMO!

M. DEL RÍO DUVI 02/10/2020

Despois dos meses de confinamento e do verán xa é hora de regresar a unha rutina saudable de práctica deportiva. Para iso a Área de Benestar, Saúde e Deporte acaba de abrir o prazo de solicitude dos abonos cos que conta a UVigo e que permiten facer un uso regular das súas instalacións. Por unha banda, a modalidade básica dá acceso aos vestiarios, armarios e pista de atletismo e, por outra, o [Abono MuVer](#) permite o uso dun amplo abano de instalacións e ofrece vantaxes para practicar deporte nos tres campus.

CHEGA AO CAMPUS UN NOVO GRUPO DE ALUMNADO ASIÁTICO PARA PARTICIPAR NA 5ª EDICIÓN DE CAMPUS SPAIN

DUVI 05/10/2020

Nun curso marcado pola pandemia da covid-19 e no que o medo a novos confinamentos frea en moitos casos os desexos dos estudantes de realizar estancias internacionais, o campus de Vigo deu este luns a benvida a un grupo de 16 mozas e mozos asiáticos que permanecerán na cidade ata o vindeiro mes de xullo. Son os integrantes da 5ª edición de Campus Spain, un proxecto centrado na promoción de España como destino educativo e en labores de asesoramento a alumnado internacional, tanto na xestión de visados como de permisos de estancia ou a admisión en universidades españolas. [+info](#).



Foto de familia do alumnado participante na 5ª edición de Campus Spain



Cartaz da actividade

MULLERES “CON NOME PROPIO” PARA BOTAR UNHA OLLADA CON PERSPECTIVA DE XÉNERO Á ANTIGÜIDADE

DUVI OURENSE 05/10/2020

O luns 19 de outubro celebrárase a terceira edición das Xornadas: Olladas á Antigüidade, organizadas cada curso académico pola profesora e decana da Facultade de Historia do campus de Ourense Susana Reboreda. Nesta edición, a cita leva por título *Mulleres con nome propio* co obxectivo de pór o foco en personaxes femininos destacados do pasado e por primeira vez, atendendo á situación sanitaria provocada pola covid-19, desenvolverase de xeito virtual, non presencial. [+info.](#)



As actividades desenvólvense en instalacións do campus

PARA UNHA VIDA MÁIS SAUDABLE, ACTIVIDADES DIRIXIDAS E ESCOLAS DEPORTIVAS

DUVI OURENSE 06/10/2020

O campus de Ourense, a través da Área de Benestar, Saúde e Deporte da Universidade de Vigo, xa ten en marcha as actividades deportivas para o curso 2020/2021. Actividades dirixidas e escolas deportivas deste cuadrimestre arrancan a súa programación “co ánimo de fomentar, entre a comunidade universitaria e o resto da cidadanía, a práctica da actividade física como un dos pilares dos hábitos de vida saudables que máis contribúen a mellorar a calidade de vida das persoas”, segundo explican desde a área organizadora. [+info.](#)



Puentes e Lema, durante a primeira clase do obradoiro

A FORMACIÓN EN LINGUA DE SIGNOS ASÉNTASE NO CAMPUS PESE ÁS DIFICULTADES QUE IMPLICA A PANDEMIA

DUVI PONTEVEDRA 06/10/2020

Por terceiro curso consecutivo, desenvólvese no campus o obradoiro de extensión universitaria *Comunícate coas mans*, que, coas súas 20 prazas cubertas, busca iniciar ao alumnado na lingua de signos. Mais aló das medidas sanitarias, a crise sanitaria xerada pola covid-19 supón unha dificultade engadida para este taller inserido na programación de obradoiros da Vicerreitoría do campus para o primeiro cuadrimestre, dada a importancia que nesta lingua ten a expresión facial. [+info.](#)



CINBIO ORGANIZA UNHA XORNADA FORMATIVA SOBRE COMUNICACIÓN DA CIENCIA

DUVI 07/10/2020


Falar de ciencia e da importancia de difundir os seus resultados. O Centro de Investigacións Biomédicas, Cinbio, está a organizar para o vindeiro venres día 16 a xornada formativa *Hablemos de ciencia: la importancia de comunicar*, unha actividade dirixida ao persoal científico e investigador e na que se contará coa participación de especialistas que tratarán de dar algunhas claves sobre comunicación para o desenvolvemento persoal e a igualdade. [+info.](#)



SEIS PROXECTOS PARA FOMENTAR O COÑECEMENTO DOS ESTUDOS DE XÉNERO NA SOCIEDADE DIXITAL

M. DEL RÍO DUVI 07/10/2020

A presenza das mozas nas enxeñaría, os machismos e os imaxinarios de xénero na rede, as vocacións matemáticas entre as alumnas ou a intelixencia artificial e o xénero. Estas son algunhas das temáticas dos proxectos seleccionados na convocatoria de axudas de investigación da Cátedra Feminismos 4.0 Depo-UVigo. En total son seis propostas que reciben unha achega de entre 6000€ e 3500€ para fomentar o coñecemento no eido da cultura e da sociedade dixital en estudos de xénero. [+info.](#)



Gráfica da bsorción de humidade anómala dos eventos de ríos atmosféricos que tocaron terra entre 1980 e 2017

‘NATURE COMMUNICATIONS’ PUBLICA UN ARTIGO DE EPHYSLAB QUE CONCLÚE QUE O CAMBIO CLIMÁTICO ESTÁ INCREMENTANDO A HUMIDADE DOS RÍOS ATMOSFÉRICOS

DUVI OURENSE 08/10/2020

A revista científica *Nature Communications* publicou este xoves un artigo liderado por investigadores do Grupo Ephyslab da Universidade de Vigo (CIM-UVigo) no que se indica que a humidade dos ríos atmosféricos está aumentando un 7% por cada grao de incremento da temperatura global do planeta. O texto é froito dun estudo realizado sobre o período temporal 1980-2017 e o seus resultados “revelan un aumento moi importante e significativo da cantidade de humidade dende as rexións que achegan a auga precipitable que será transportada cara os continentes polos chamados ríos atmosféricos”. [+info.](#)




Ana Rodríguez Vázquez na apertura das xornadas

EXPERTAS AVOGAN POR POTENCIAR AS POLÍTICAS DE IGUALDADE DENTRO DA RESPONSABILIDADE SOCIAL EMPRESARIAL

D. BESADÍO DUVI 14/10/2020

Potenciar as políticas de igualdade dentro da responsabilidade social empresarial (RSE) é, a día de hoxe, un obxectivo a cumprir para as empresas, non só a nivel galego, senón tamén español e internacional. Así o deixaron ver este mércores as participantes na Xornada *A igualdade na Axenda 2030*, unha actividade que, debido á actual situación sanitaria, se celebrou no Teatro Vidal Bolaño da Cidade Universitaria. [+info](#).



Jorge Soto e Manuel Reigosa, durante unha sesión celebrada a través de Campus Remoto

ACHEGARSE Á CIDADE, UN DOS RETOS DE FUTURO DA UNIVERSIDADE EN PONTEVEDRA

DUVI PONTEVEDRA 15/10/2020

Os retos de futuro do campus pontevedrés, así como a situación na que se atopa en comparación cos outros seis campus galegos, centraron este xoves a intervención do reitor da Universidade de Vigo, Manuel Reigosa, na primeira sesión do Consello de Campus de Pontevedra do presente curso. Nunha xuntanza celebrada de xeito virtual por mor da situación sanitaria, Reigosa explicou que o futuro grao en Deseño “está seguindo seu camiño” de cara a conseguir a avaliación positiva por parte da Xunta de Galicia. [+info](#).



Os sensores dos reloxoos intelixentes envían os datos a unha app para ser analizados por un algoritmo de clasificación

INVESTIGADORES DE ATLANTTIC AVANZAN NO DESENVOLVEMENTO DUNHA SOLUCIÓN TECNOLÓXICA PARA O CONTROL DO LAVADO DE MANS

DUVI 15/10/2020

O 15 de outubro celébrase o Día Mundial do Lavado de Mans, unha data que este ano cobra especial relevancia debido á crise sanitaria da covid-19 que pon de manifesto a eficacia desta medida hixiénica para protexerse do coronavirus, sempre e cando se realice de acordo ás pautas indicadas pola comunidade médica. Precisamente, conscientes da importancia desta simple acción, os investigadores Juan Manuel Santos Gago, Luis Álvarez Sabucedo e Mateo Ramos, do Grupo de Enxeñaría de Sistemas Telemáticos -GIST- do centro de investigación atlantTic, acaban de poñer en marcha un proxecto que busca desenvolver unha solución tecnolóxica que ofrezca soporte á aprendizaxe do proceso de lavado de mans, atendendo ás recomendacións da Organización Mundial da Saúde (OMS). [+info](#).



Larriba e Reigosa presentaron este convenio nunha rolda de prensa virtual

25 ESTUDANTES PODERÁN REALIZAR AS SÚAS PRÁCTICAS EN DIFERENTES ÁREAS DA SUBDELEGACIÓN DO GOBERNO

DUVI PONTEVEDRA 15/10/2020

Un máximo de 25 alumnos e alumnas de grao e mestrado poderán realizar cada curso prácticas académicas externas, tanto curriculares como extracurriculares, nas diferentes áreas de xestión da Subdelegación de Goberno en Pontevedra grazas ao convenio asinado entre a Universidade de Vigo e a Secretaría de Estado de Política Territorial e Función Pública do Goberno de Estado. [+info.](#)



Larriba e Reigosa presentaron este convenio nunha rolda de prensa virtual

A UNIVERSIDADE ORGANIZA MÚLTIPLES ACTIVIDADES PARA PROMOVER O ACCESO ABERTO AO COÑECEMENTO CIENTÍFICO

DUVI 15/10/2020

Do 19 ao 25 de outubro celébrase mundialmente a Semana Internacional do Acceso Aberto, unha iniciativa anual para promover o acceso libre e igualitario ao coñecemento científico e, por primeira vez na historia da institución, a Universidade de Vigo vaise sumar este ano a esta iniciativa coa organización de diferentes actividades programadas pola Biblioteca Universitaria en colaboración coa Vicerreitoría de Investigación e dirixidas a toda a comunidade universitaria. [+info.](#)



A cita contou coas intervencións de Agnès García, Rosa Cid, Ana Iriarte e Rosa Sanz

REFERENTES DA ANTIGÜIDADE QUE VISIBILIZAN O PAPEL DA MULLER NA HISTORIA

DUVI OURENSE 19/10/2020

O Campus Remoto da UVigo acolleu este luns a celebración *on-line* das III Xornadas: Olladas á Antigüidade, organizadas pola profesora e decana da Facultade de Historia do campus de Ourense Susana Reboreda. A cita, que levou por título *Mulleres con nome propio*, permitiu ao máis de medio centenar de asistentes achegarse á historia de personaxes históricos concretos das catro grandes culturas da antigüidade (Próximo Oriente, Exipto, Grecia e Roma) e ao mesmo tempo reflexionar sobre como se realiza esta ollada ao pasado desde unha perspectiva de xénero. [+info.](#)



Un dos adhesivos colocados nos baños dos centros

O CAMPUS REDUCE O CONSUMO DE AUGA COA REVISIÓN DE TODAS AS SÚAS BILLAS

DUVI PONTEVEDRA 19/10/2020

A optimización dos consumos de auga e de enerxía constitúe unha “das liñas de actuación prioritarias” do programa Green Campus, como sinala o seu director, Carlos Souto, e nela insírense cada curso diferentes iniciativas, como a “auditoría” realizada nos últimos meses nas billas dos lavabos, laboratorios e vestiarios das diferentes facultades e escolas do campus. Esta serie de medicións levaron a axustar os caudais de auga das diferentes billas, reducindo nalgúns dos casos a media de litros por minuto en máis do 60%. [+info.](#)



A planta situarase entre as facultades de Ciencias Sociais e da Comunicación e Ciencias da Educación e do Deporte

CONCEDIDA A LICENCIA PARA A INSTALACIÓN DUNHA REDE DE BIOMASA QUE REDUCIRÁ ÁS EMISIÓN DE CO2 DOS CENTROS PONTEVEDRESES

DUVI PONTEVEDRA 19/10/2020

A Xunta de Goberno do Concello de Pontevedra aprobou este luns conceder á Universidade de Vigo a licencia de obras para a instalación dunha rede de produción e distribución de calor baseada en biomasa no campus, que se emprazará entre as facultades de Ciencias Sociais e da Comunicación e Ciencias da Educación e do Deporte. [+info.](#)



Captura da web de The Conversation

A UNIVERSIDADE ADHÍRESE A 'THE CONVERSATION', UNHA DAS PRINCIPAIS PLATAFORMAS MUNDIAIS DE DIVULGACIÓN

DUVI 19/10/2020

A Universidade de Vigo acaba de asinar un acordo de colaboración coa plataforma de divulgación científica *The Conversation* España (TCES), o que lle permitirá ao persoal docente e investigador da institución académica viguesa escribir sobre asuntos relativos ao seu campo de especialización a través dunha das principais plataformas mundiais de divulgación. O obxectivo deste convenio é fomentar a transferencia dos resultados de investigación que se realizan na Universidade e, ao mesmo tempo, permite tamén que comunidade investigadora reciba relevancia mediática e intrainstitucional, ademais de recoñecemento social e profesional. [+info.](#)



O conselleiro e os reitores durante a visita ao edificio

A SEDE DE SERVIZOS TRANSVERSAIS DAS TRES UNIVERSIDADES GALEGAS ESTARÁ REMATADA A VINDEIRA PRIMAVERA NA CIDADE DA CULTURA

DUVI 19/10/2020

Cun 70% da obra executada, o edificio Fontán da Cidade da Cultura, que será a sede de servizos transversais das tres universidades galegas, estará rematado na primavera de 2021. Así o avanzou este mediodía o conselleiro de Cultura, Educación e Universidade, Román Rodríguez, nunha visita ás obras xunto aos reitores das tres universidades galegas: Antonio López, de Santiago; Manuel Reigosa, de Vigo e Julio Abalde, de Coruña, na que tamén asegurou que o bo ritmo das obras está a permitir resolver o efecto que tivo nos traballos a suspensión da actividade durante o confinamento. [+info](#).



Isaías Basilio de Souza é estudante de cuarto curso do Grao de Dereito

UN ALUMNO DE DEREITO, ENTRE OS NOVOS EMBAIXADORES DO PROGRAMA EU CAREERS

DUVI OURENSE 20/10/2020

O estudante de cuarto curso do Grao de Dereito do campus de Ourense Isaías Basilio de Souza foi seleccionado recentemente pola Unión Europea como estudante embaixador do programa EU Careers. Durante un ano o seu papel consistirá en promover no conxunto da Universidade de Vigo, e non só na Facultade de Dereito na que estuda, as oportunidades das carreiras profesionais nas institucións europeas. [+info](#).



Alfonso Palomanes, cun paciente da Unidade de Fisioterapia o pasado curso

AS UNIDADES DE FISIOTERAPIA E MEDICINA DEPORTIVA REINICIAN A SÚA ACTIVIDADE

DUVI PONTEVEDRA 20/10/2020

Tralo parón obrigado pola covid-19, co novo curso académico recuperan a súa actividade varias das iniciativas da [Área de Benestar, Saúde e Deporte da Universidade](#), como os servizos de Fisioterapia e Medicina Deportiva, que, no caso do campus pontevedrés, retoman nestes días a súa actividade tralas obras de acondicionamento do espazo que ocupan na Escola de Enxeñaría Forestal. [+info](#).



A SEGURIDADE DO UNIVERSO DIXITAL NO TELETRABALLO CENTRARÁ A SEGUNDA EDICIÓN DO FORO CYBERSEC@GAL

DUVI 20/10/2020

A normativa, as solucións, os retos e ameazas no campo da seguridade do universo dixital no teletraballo centrarán a segunda edición de CyberSec@GAL, o evento referente da ciberseguridade en Galicia, que se celebrará entre os días 2 ao 5 de novembro. O encontro, organizado pola Cátedra R en ciberseguridade, é froito da colaboración entre as universidades de Vigo e A Coruña, a empresa R e o Colexio Profesional de Enxeñaría en Informática de Galicia (CPEIG), e conta coa colaboración de atlanTTic, Citic, Isms Forum, Coit, Amtega e Gradiant. [+info.](#)



PLANTAS FOTOVOLTAICAS PARA AS ESCOLAS DE ENXEÑARÍA DE MINAS E ENERXÍA E INDUSTRIA

DUVI 20/10/2020

O vindeiro mes de novembro entrarán previsiblemente en funcionamento dúas plantas fotovoltaicas, unha na Escola de Enxeñaría de Minas e Enerxía e outra na Escola de Enxeñaría Industrial. Voltfer, división do Grupo Alvariño especializada en solucións en enerxías renovables, será a encargada da instalación das plantas que suman unha potencia conxunta de 320 kW/ano e permitirán a produción de 390.000 Kwh/ano. [+info.](#)



O Sergas facilitou á UVigo 15.000 test rápidos de detección en sangue

ARRANCA NOS TRES CAMPUS A CAMPAÑA DE CRIBADO MASIVO DE COVID-19 DA XUNTA DE GALICIA

DUVI 21/10/2020

Dende este mércores e ata a próxima semana, nos tres campus da UVigo estase a desenvolver a campaña de cribado de covid-19 impulsada pola Xunta nas tres universidades galegas co obxectivo de coñecer a expansión do coronavirus entre o alumnado. En total, dende o Sergas enviaron á Universidade de Vigo máis de 15.000 test rápidos que, dende hoxe estarán a disposición do estudantado nas escolas e facultades de Vigo, Ourense e Pontevedra. [+info.](#)

Outubro 2020.



O Sergas facilitou á UVigo 15.000 test rápidos de detección en sangue

EXPERTOS NACIONAIS E INTERNACIONAIS ANALIZARÁN NUNHA XORNADA EN CC XURÍDICAS E DO TRABALLO A IGUALDADE DE XÉNERO E A FISCALIDADE

M^a DEL CARMEN ECHEVARRÍA DUVI 21/10/2020

“A preocupación polas cuestións de xénero ten natureza transversal e o sistema tributario tamén pode desempeñar, e, de feito desempeña, un papel na procura de solucións”, aseguran Ana María Pita Grandal e Carmen Ruíz Hidalgo, docentes e investigadoras do departamento de Dereito financeiro e tributario da UVigo e organizadoras da xornada *Igualdade de xénero e fiscalidade. Perspectiva de xénero no imposto sobre a renda das persoas físicas*, que se desenvolverá este xoves e venres, a través de Campus Remoto. [+info.](#)



A Universidade de Vigo amplía este curso as axudas Incuvi ao emprendemento cunha terceira modalidade: Consolida

A UNIVERSIDADE RENOVA A SÚA APOSTA POLO EMPRENDEMENTO AMPLIANDO OS PREMIOS INCUVI

D. BESADÍO DUVI 22/10/2020

Incuvi Emprende, Incuvi Avanza e agora tamén Incuvi Consolida. A Universidade de Vigo amplía este curso as axudas Incuvi ao emprendemento cunha terceira modalidade pensada para que aquelas iniciativas empresariais xa constituídas e que pasaron polo programa Avanza poidan seguir recibindo mentorización específica e unha axuda económica que lle faga máis levadeiros os gastos de xestión derivados da súa actividade como entidade xurídica consolidada. [+info.](#)



Sara Olvera é socióloga e sexóloga experta en xénero e igualdade

UNHA OPORTUNIDADE PARA COÑECER A “REVOLUCIÓN SILENCIOSA” DAS MULLERES XITANAS

DUVI OURENSE 22/10/2020

Baixo o título A revolución silenciosa das mulleres xitanas, o Campus Remoto da Universidade de Vigo acollerá o luns 26 de outubro unha conferencia de Sara Olvera, socióloga e sexóloga experta en xénero e igualdade e activista xitana. Nela afondará para o alumnado da Facultade de Educación e Traballo Social do campus e para as persoas interesadas nos conceptos, evolución e figuras do feminismo xitano. [+info.](#)



O congreso desenvolverase, de xeito virtual, entre o 28 e o 30 de outubro

UN CONGRESO VIRTUAL REUNIRÁ MÁIS DE 500 ESPECIALISTAS E PROFESIONAIS DA EDUCACIÓN

DUVI PONTEVEDRA 22/10/2020

Pontevedra ía ser neste 2020 a sede do oitavo International Congress of Educational Sciences and Development, un evento dirixido a académicos, investigadores e profesionais das ciencias da educación e a psicoloxía do desenvolvemento que a crise sanitaria xerada pola covid-19 obrigou a converter en virtual. Entre o mércores 28 e o venres 30, máis de 500 especialistas e profesionais de 17 países participarán, a través da rede, nun congreso. [+info](#).

10



As conferencias terán lugar os días 4, 11 e 26 de novembro

OS CAMIÑOS DA INVESTIGACIÓN E A INNOVACIÓN EDUCATIVA CENTRAN UN CICLO DE CONFERENCIAS

DUVI PONTEVEDRA 23/10/2020

No curso 2018/2019 iniciou a súa andaina o máster interuniversitario en Investigación e Innovación en Didácticas Específicas para Educación Infantil e Primaria, que ten na Facultade de Ciencias da Educación e do Deporte unha das súas tres sedes. Dirixido a proporcionar unha especialización nestes dous ámbitos tanto a graduados e graduadas como a profesionais da docencia, este mestrado promove por primeira vez un ciclo de conferencias dirixido a presentar “experiencias concretas de innovación e investigación relacionadas coas súas temáticas”, como explica o seu coordinador, o profesor Uxío Pérez. [+info](#).



A INVESTIGADORA HELENA ESTABLER REPASA A HISTORIA DAS "ESCRITORAS ESQUECIDAS" DO SÉCULO DAS LUCES

DUVI 23/10/2020

O Século da Luces non foi igual de luminoso en todos os países e, mentres en Reino Unido ou Francia as mulleres escritoras comezan a alzar a súa voz na procura dun lugar propio, en España o camiño foi máis complexo. Con todo, e a pesar de que moitas delas son pouco coñecidas, houbo unha serie de mulleres pioneiras que loitaron por profesionalizar a súa escritura. [+info](#).



O ciclo 'Redes Galegas' desenvolverase a través de Campus Remoto

UN CICLO DE COLOQUIOS VIRTUAIS PORÁ O FOCO NA PRESENZA DO GALEGO NA REDE

DUVI PONTEVEDRA 26/10/2020

A crise sanitaria impediu que a Facultade de Ciencias Sociais e da Comunicación celebrase o pasado curso o Día das Redes Galegas, unha xornada dirixida a analizar a importancia das redes sociais dentro da comunicación do século XXI e o papel que estas poden xogar á súa vez na difusión do galego. Este evento, que adoitaba celebrarse nas semanas previas ao Día das Letras Galegas, reconvértese agora no ciclo de coloquios virtuais *Redes Galegas* que, a través de Campus Remoto, terá lugar os días 29 de outubro e 5 e 12 de novembro. [+info](#).



Cartaz da actividade

ALUMNADO DE DOCE UNIVERSIDADES PARTICIPARÁ NUNHA XORNADA SOBRE CONTROL DE XESTIÓN DESDE A PERSPECTIVA DE XÉNERO

DUVI OURENSE 27/10/2020

A pesar de que as mulleres representan a metade da sociedade e dos avances en igualdade acadados, na actualidade arredor de tres de cada catro postos de control de xestión están ocupados por homes e só un por mulleres. Tendo en conta esta cifra, o pasado ano púxose en marcha desde a Facultade de Ciencias Empresariais e Turismo do campus de Ourense a xornada *Control de xestión desde unha perspectiva de xénero*. [+info](#).



Anaís Rivas, Jorge Soto, Luis Torres e Carlos Souto

O CAMPUS APOSTA POLOS PRODUTOS ECOLÓXICOS E DE PROXIMIDADE COA CREACIÓN DUN GRUPO DE CONSUMO

DUVI PONTEVEDRA 27/10/2020

Promover o consumo de alimentos de proximidade e ecolóxicos entre a comunidade universitaria é o propósito central do grupo de consumo Campus de Pontevedra, unha iniciativa inserida dentro das accións do programa Green Campus, que implicou a creación dunha asociación que subscribiu un convenio coa Universidade. Este grupo de consumo, presentado este martes na sede da Vicerreitoría, realizará pedidos semanais de alimentos ecolóxicos e de proximidade e estará aberto nun primeiro momento a docentes, persoal de administración e servizos e estudantes de doutoramento. [+info](#).



Captura do espazo web desta nova feira de emprego

A UVIGO APOSTA TAMÉN POLA VIRTUALIDADE NAS FEIRAS DE EMPREGO UNIVERSITARIO

D. BESADÍO DUVI 27/10/2020

A Universidade de Vigo levaba tempo apostando pola modalidade virtual nas feiras de emprego, unha opción que ata o de agora se combinaba co formato presencial, pero a situación sanitaria provocada pola covid-19 obrigou este ano a renunciar á parte presencial e centrar todos os esforzos na versión dixital. O resultado é OnEJob 2020, a Feira Europea de Emprego para graduados/as en liña, o evento co que a institución académica viguesa reempraza á Finde.U, a tradicional feira de emprego universitario que viñan coorganizando desde hai anos as universidades de Vigo, Porto e Tras Os Montes e Alto Douro. [+info](#).

12



Foto das mulleres científicas do grupo local do proxecto Soapbox Science Berlin, participantes nesta iniciativa

MULLERES CIENTÍFICAS ÚNENSE PARA PEDIR MEDIDAS URGENTES QUE FREEN A PERDA DE ACADÉMICAS NO ÁMBITO DA ECOLOXÍA

DUVI 27/10/2020

Son moitos os estudos que demostran que a presenza de mulleres nas universidades e nos organismos de investigación diminúe a medida que se incrementa o nivel de responsabilidade. É o que o CSIC deu en chamar “gráfica en tesoira”, na que se visibiliza un patrón de perda de mulleres a medida que se ascende na carreira profesional, mentres que a taxa de homes se dispara en postos fixos e de responsabilidade. [+info](#).



'OS VENRES AO VENTO', UN SEMINARIO INTERNACIONAL NA PROCURA DUN SISTEMA ENERXÉTICO SUSTENTABLE E EQUITATIVO

M^a DEL CAMEN ECHEVARRÍA DUVI 28/10/2020

Co dobre obxectivo de dar a coñecer a existencia de diferentes formas de organizar o sistema enerxético e colocar no debate público os aspectos máis significativos relacionados coa enerxía eólica, o vindeiro venres 30 de outubro arrancará o Seminario internacional por un Sistema Enerxético Sustentable e Equitativo. [+info](#).



Realizaron traducións culturalmente adaptadas, cursos e unha guía de boas prácticas

O PROXECTO MELINCO TENDE UNHA PONTE LINGÜÍSTICA PARA MELLORAR A COMUNICACIÓN ENTRE AS ONGD E AS PERSOAS MIGRANTES OU REFUXIADAS

DUVI 29/10/2020

Cando unha persoa doutra nacionalidade, cultura ou relixión chega a un país alleo atopa múltiples barreiras, comezando pola lingüística. Pero cando esas persoas migrantes se atopan nunha situación de vulnerabilidade, en busca de asilo ou refuxio, o descoñecemento do idioma pode ter consecuencias moi severas. Así o explican as ONG que atenden a mulleres e homes que precisan establecer con estas institucións unha vía de comunicación. [+info.](#)

13



A actividade está organizada pola Cátedra de Empresa Familiar, que ten a súa sede na Facultade de Ciencias Empresariais e Turismo

UN CICLO DE CONFERENCIAS AFONDRARÁ NA RELACIÓN ENTRE EMPRESA FAMILIAR E SOSTIBILIDADE

DUVI OURENSE 29/10/2020

Baixo o título *Empresa familiar e sostibilidade*, a Cátedra de Empresa Familiar da Universidade de Vigo desenvolverá este curso académico un ciclo de conferencias no que representantes do sector en Galicia exporán a súa experiencia en accións de circularidade económica, entendendo por circularidade económica a estratexia centrada na redución tanto do consumo de novas materias primas como da produción de residuos. [+info.](#)



SSEC: Sistema de Seguimento de Enfermidades Crónicas é un sistema informático que ten como obxectivo o seguimento das enfermidades crónicas

UN SISTEMA PARA O SEGUIMENTO DE ENFERMIDADES CRÓNICAS E UN DISPOSITIVO DE AXUDA Á DETECCIÓN PRECOZ DO CANCRO DE MAMA, PREMIOS DA CÁTEDRA MN

DUVI 29/10/2020

O traballo *SSEC: Sistema de Seguimento de Enfermidades Crónicas* de Pablo Pazos Domínguez, estudante do Grao en Enxeñaría Informática, e *BReAst: sujétate a la vida*, desenvolvido polo equipo de estudantes da Escola de Enxeñaría de Telecomunicación formado por Silvia Abal Fernández, Angela Abreu Iglesias, Candela Janeiro Catoira, Maria Purriños Paz e Antón Soares Rial, son os gañadores da primeira edición dos Premios Cátedra MN. [+info.](#)



O curso de cociña virtual foi a primeira das actividades en pórse en marcha



Universidade de Vigo

Cartel das xornadas



Imaxe dos traballos de laboratorio que se están realizando no marco do proxecto

'FALAMOS' PON EN MARCHA O SEU PROGRAMA DE ACTIVIDADES PARA QUE O ALUMNADO SOCIALICE EN GALEGO

DUVI PONTEVEDRA 29/10/2020

Promover o uso do galego como lingua de socialización entre a comunidade universitaria é o obxectivo de *Falamos*, un programa impulsado pola Concellería de Normalización Lingüística do Concello de Pontevedra e a Área de Normalización Lingüística da Universidade. Co propósito de animar ao alumnado a facer do galego a súa lingua habitual, esta iniciativa engloba unha serie de actividades que nestes días levan a cabo as súas primeiras sesións e actos de presentación. [+info.](#)

DA REPRESIÓN FRANQUISTA Á QUERELA ARXENTINA, UNHAS XORNADAS AFONDRARÁN NA IMPORTANCIA DE RECUPERAR A MEMORIA E A VERDADE

D. BESADÍO DUVI 29/10/2020

Un punto de encontro no que reflexionar sobre o que significa a memoria e a xustiza para a superación de procesos ditatoriais que afectan transversalmente á sociedade, e singularmente ás mulleres e outros colectivos que sofren discriminación. Esta é a idea coa que os profesores Xosé Manuel Pacho, da Facultade de Ciencias Xurídicas e do Traballo, e Pablo Bonorino, da Facultade de Dereito, organizaron a Xornada *Muller, memoria e xustiza transicional*. [+info.](#)

O PROXECTO ALEHOOP OBTERÁ PROTEÍNAS DIETÉTICAS DE RESIDUOS DE MACROALGAS E LEGUMINOSAS

DUVI OURENSE 30/10/2020

Obter proteínas dietéticas de biomasa residual de macroalgas e leguminosas. Este é o obxectivo do proxecto europeo Alehoop, posto en marcha recentemente por 16 socios de seis países, entre eles a Universidade de Vigo. Nel traballárase durante catro anos na utilización de biorefinerías para a valorización de biomasa residual procedente de macroalgas e subprodutos do procesamento de leguminosas para obter novas cadeas de valor a través de proteínas para aplicacións de alto valor en alimentos e pensos para animais. [+info.](#)

Outubro 2020.



Jorge Soto e José María Cancela, no
embarcadero do campus

O CAMPUS CONTA XA COA SÚA PROPIA PORTA AO LÉREZ

DUVI PONTEVEDRA 30/10/2020

Co obxectivo en primeiro termo de dar servizo ás materias relacionadas con deportes náuticos que se imparten na Facultade de Ciencias da Educación e do Deporte, pero co propósito tamén de que se converta nunha instalación para o conxunto da cidadanía, a Vicerreitoría do campus acometeu a comezos de ano as obras de instalación dun embarcadero na marxe norte do río Lérez. Mais esta actuación completouse poucos días antes de que se decretase o estado de alarma o que, sumado á suspensión da actividade docente presencial, impediu que o embarcadero se puxese en funcionamento ata comezos do presente curso. [+info.](#)



O ciclo desenvólvese a través de Campus
Remoto

AS REDES SOCIAIS COMO ESCENARIO PARA ACHEGAR O GALEGO Á MOCIDADE

DUVI PONTEVEDRA 30/10/2020

A crise sanitaria converteu neste 2020 o Día das Redes Galegas, que a Facultade de Ciencias Sociais e da Comunicación dedica cada ano a afondar na importancia das redes sociais dentro do sector da comunicación, nun ciclo de coloquios virtuais. Organizado polos profesores Alberto Dafonte e Andrés Fraga coa colaboración da Área de Normalización Lingüística (ANL) da Universidade de Vigo e da Secretaría Xeral de Política Lingüística da Xunta de Galicia, o ciclo *Redes Galegas* celebrou na noite deste xoves a súa primeira sesión, protagonizada pola da xornalista María Yañez e do *youtuber* Mario Brión. [+info.](#)

UNIVERSIDADE DE VIGO

Unidade de Análisis e Programas.

Edificio Filomena Dato.

Planta Baixa.

36310 Vigo (Pontevedra)

986.818.689 986.818.640